



ORANJESTAD (AAN): Awe Lucor Jewelers N.V. ta corda e hecho cu 15 aña pasa nan a habri nan portanan pa prome biaha den Oranjestraat 26-A. Tabata Cornelio y Ludwina Vis kendenan a tuma e iniciativa pa bay den empresa priva, cu un propio negoshi. Pesey tambe e nomber di "Lucor" ta deriva di Ludwina y Cornelio.

Den un establecimiento masha chiquito den Oranjestraat a cuminsa y awe despues di 15 aña nan tin un total di 3 establecimiento, esta den Hendrikstraat, den Caya Betico Croes, y e ultimo adquisicion ta den Holland Aruba Mall. Y tur esaki ta basa riba trabao duro, inicialmente di Cornelio y Ludwina mes, pero tambe di nan personal di prome oranan. Actualmente Lucor Jewelers tin 25 empleado den servicio.

"Nos a sa di trece un bon producto riba mercado, cu ta e motibo principal cu awe nos ta goza di confianza di nos clientela. Nos lema tabata y lo ta, pa complacer cu nos localnan, pasobra tin hopi negoshi berdad, pero nan ta mira unicamente riba e industria turistico," Cornelio Vis a declara na DIARIO.

Segun Ludwina Vis, enberdad hopi establecimiento den joyeria a habri nan porta na Aruba, cu vista riba turismo. Pero Lucor fuera di a percura pa e clientela local, a sa di yuda tambe e bishitantenan. Lucor awe tin e joyero di mas bieu y di mas experiencia na Aruba.

Puntrando si tin plan di expansion como cu dia cu Lucor a habri nan negoshi den Caya Betico Croes, a ser bisa, cu tin plannan grandi, Cornelio Vis a confirma cu esaki ta e caso. Nan ta habri pronto un otro establecimiento y e biaha aki na Aeropuerto Internacional Reina Beatrix.

"Nos kier celebra nos tercer lustro cu nos pueblo. Lucor y su

personal kier comparti e momento aki cu ta yena nos di hubilo. Si no tabata pa nos clientela, nos no a yega unda nos ta awe. Pa e confianza deposita, nos kier lanza un campaña cu ta bay dura henter aña. Nos ta cuminsa awe cu 25% di descuento riba mayoria di mercancia. Di e forma aki nos kier yama danki na nos clientela, aunke durante aña lo tin mas sorpresa, segun Cornelio Vis a relata na DIARIO.

Pa loko ta e experiencia adqueri durante 15 aña, Vis a bisa cu enberdad hunto cu Ludwina nan a dicidi di inicia e negoshi. Sabiendo cu ya tabata tin hendenan cu experiencia den e ramo aki, pero como yiunan di tera, nan ta kere cu mester tin espacio pa nan tambe. Schouder cu schouder, nan dos a lucha y tin biaha confrontando momentonan dificil, pero a sa di sobrevivi, manera a keda demostra caba.

Nan ta duna un reconocimiento publico na Aruba Bank, cual for di prome ora a sa di duna pareha Vis-Kock un man ypa awe nan ta comerciantenan exitoso.

Lucor Jewelers pa demostra cu nan ta un negoshi di Aruba y cu lo keda aki, a demostra nan confianza den futuro di e isla. Na 1984 nan a habri e establecimiento den Hendrikstraat y pa 1987 nan a cumpra Joyeria Kan den Nassaustraat. Den e mesun aña Lucor a habri esun den Holland Aruba Mall.

"Mi ta kere cu a bira tempo pa tin mas proteccion pa comerciantenan local. Mester tin un forma di control, ora di duna permiso di establecimiento, pasobra awe enberdad tin hopi negoshi nobo, pero poco ta di inversion local mes. Mester brinda mas oportunidad na localnan, den duna facilidad di prestamo y si ta posible tambe guia," segun Cornelio Vis a declara. "Pasobra den tempo di crisis, esnan cu ta ban-

Cornelio Vis na ocasion di tercer lustro di Lucor Jewelers MESTER TIN MAS PROTECCION PA COMERCIANTENAN LOCAL



dona Aruba prome, ta esnan cu a bin di afo djis pa haci negoshi y no kier contribui ora cu cos ta malo tambe."

Ludwina agregando na esaki, ta bisa cu tin comerciantenan di afo cu ta cumpra companianan na Aruba, pero na lugar di yuda

na engrandece y bin cu competencia sano, mas bien ta bin pa daña mercado.

Como cu Lucor ta di fiesta, no ta momento pa bay den detayes, pero na su debido tempo lo mester denuncia e practicanan aki, pa asina siquiera esnan

responsable tuma accion. Mientras tanto Lucor ta celebrando, y gratitud ta bay na henter pueblo y di parti di

DIARIO un palabra di pabien na gerencia y personal di Lucor Jewelers.